

DOMINGU XV TEMPU KOMÚN – TINAN B

Liturjia Domingu XV Tempu Komun nian fó hanoin mai ita katak Maromak atua iha mundu liuhusi mane no feto sira ne'ebé Nia bolu no haruka nu'udar testemuña ninia projetu salvasaun nian. Ema sira ne'ebé nia haruka tenke iha nu'udar prioridade boot fidelidade ba Maromak nia projetu no la'ós ba sira-nia interese rno priviléjiu rasik.

Leitura dahuluk apresenta mai ita ezemplu profeta Amós nian. Maromak hili, bolu no haruka profeta atu propoin ba ema sira – ho lialoos no koerénsia – Maromak nia mehi no projetu sira ba mundu. Atua ho liberdade totál, profeta la husik nia an atu hetan manipulasaun husi kbiit-na'in sira ka babeur husi ninia interese pesoál sira.

Leitura daruak garante katak Maromak iha projetu moris nakonu nian, loos no totál ba ema ida-idak mane no feto – projetu ida ne'ebé horiuluk kedas iha Maromak nia neon. Projetu ne'e, apresenta ba ema sira liuhusi Jezús Kristu, ezije husi ita ita ida-idak resposta desidida, totál no laho evazaun ka halai subar.

Iha Evanjellu, Jezús haruka eskolante sira ba misaun. Misaun ne'e – nu'udar prolongamentu Jezús nia misaun rasik – konsiste iha haklaken Reinu no luta ho objetividade kontra buat hotu ne'ebé halo ema sai atan no hanetik nia atu haksolok. Molok eskolante sira bá, Jezús fó instrusaun ruma kona-ba forma realiza misaun... Nia konvida ho modu espezial ba kakiak, simplisidade, hamamuk an husi soin materiál sira.

LEITURA I – Am 7,12-15.

AMBIENTE

Amós, “profeta justisa sosiál nian”, ezerse ninia ministériu profétiku iha reinu tasi-feto nian (Israel) iha sékulu VIII mK nia klaran (+ iha 72 mK), durante Jeroboão II nia ukun. Ne'e mak época ida prosperidade ekonómika no hakmatek polítika nian: Jeroboão II nia konkista sira haluan reinu nia baliza no permite entrada tributu nian husi povu seluk ne'ebé ihania okos, komérsiu no indústria (mineira no tékstil) buras ho modu signifikativu...

Prosperidade no moris-di'ak klase aas sira kontrasta ho moris-mukit klase ki'ik sira-nian. Sistema distribuissau nian iha negosiante na'ok-teen sira nia liman, ne'ebé espekula presu sira. Ho presu ne'ebé sa'e kona-ba soin esensial sira, família ho rekursu uitoan de'it halo tusan no ikusmai lakon sira nia rai hotu ba rai-na'in boboot sira (latifundáriu). Klase dirijente domina tribunál sira no suborna juíz sira, hodi impede tribunál halo justisa ba kiak sira no defende ema kbiit-laek ninia direitu.

Entretantu, relijiaun buras ho ritu boboot ne'ebé molok nunca haree. Festa boboot, sakrifisiu naresin, kultu nabilan, marka vida israelita sira-nian... Problema mak kultu ne'e la la'o hamutuk ho moris: lora ba lora sira ne'ebé partisipa iha ritu sira-ne'e maka pratika injustisa kontra ema-kiak no hanehan direitu hotu. Liután ne'e, ema-riku sira oferese oferta barabarak ba Maromak atu halo hakmatek sira-nia konxiénsia kulpada no asegura Maromak ba sira-nia parte ho sira-nia negósiu foer... Aleinde ne'e, influénsia relijian kananeia nian lori israelita sira ba sinkretizmu relijiozu: kultu ba Jahwéh kahur ho rituál jentiu sira-nian ba maromak Baal no Astarte. Konfuzau relijioza ida-ne'e lori risku ba fiar jahwista nia pureza. Iha kontestu ida-ne'e mak mosu profeta Amós. Naturál Técuá nian (aldeia ki'ik ida iha rai-fuik maran Judá nian), Amós la'ós profeta profesionál; maibé, simu bolun husi Maromak, nia husik nia rain no bá iha reinu viziñu atu hakilar ba klase dirijente ninia denúnsia profétika. Ninia diskursu maka'as, hamutuk ho ninia fiar korajoza, hatudu buat ruma rai-fuik maran nian no kontrasta ho luxu sosiedade israelita época ne'ebá nian. Epizósiu ne'ebé leitura dahuluk propoin

ma ita domingu ne'e, lori ita ba santuáriu Betel nian iha sentru Palestina nian. Nia mak fatin lulik antigu liu. Tuir Gn 35,1-8, Jacob harii iha ne'ebá altár ida no dedika ba Jahwéh. Ikusmai, Betel mosu nu'udar fatin iha-ne'ebé halibur "Israel tomak" nia assembleia atu "konsulta Maromak" (kf. Jz 20,18), atu tanis iha Maromak nia oin ninia moris-susar (kf. Jz 20,26) no atu hasoru Maromak (kf. Jz 21,2). Buat ne'e hotu reflète fatin kultu nian ne'e ninia importánsia.

Bainhira Maromak nia Povu fahe tiha ba reinu rua, ho Salomão nia mate (932 a.C.), liurai sira tasi-feto nian (Israel) habiit kultu iha Betel, atu impede reinu sira desloka ba Jerusalém, ne'ebé hela iha reinu tasi-mane nian (Judá). Entaun, Betel nakfilak ba "santuáriu ofisiál" rejime nian, no liurai rasik mak finansia kultu sira. Amlulik ne'ebé prezide kultu mak "funsonáriu liurai nian", hetan knaar atu proteje liurai nia interese, iha fatin ne'ebé Isarael oan sira pasa parte signifíkativa ida sira-nia moris nian. Iha tempu ne'ebé Amós ezerse ninia ministériu profétiku iha Betel, amlulik mak Amasias. Elementu ruma ne'ebé to'o mai ita parese indika katak iha Betel iha mós ilas ida karau-oan nian, ne'ebé reprezenta Jahwéh no israelita sira adora (kf. Os 10,5).

Betel mak fatin ida ne'ebé halian profeta Amós nia denúnsia. Amós kritika injustisa sira ne'ebé liurai no klase dirijente halo no konserteza denunsia, iha fatin ne'e, kultu ne'ebé la'o ho injustisa no buka kompromete Maromak ho eskema korupsiun kbiit-na'in sira-nian.

MENSAJEN

Ita-nia testu haktuir konfrontu entre amlulik Amasias no profeta Amós. Testu ida fundamentál atu komprende misaun profeta nian, ninia liberdade hasoru interese mundu nian no kbiit institusionál.

Amlulik Amasias mak ema ida relijiaun ofisiál nian, hakruuk ba liurai nia interese no orden sira, kompromete an ho podér polítiku sira. Ba nia, buat ne'ebé importante mak mantein sistema ida ne'ebé fó benefisiu ba altár no ba tronu. Liurai mak mahein aas liu orden nian no la presiza intervensaun ida ne'ebé kuestiona orden ne'ebé estabelese ona. Relijiaun nia knaar tuir perspetiva Amasias nian mak proteje no lejítima liurai nia interese sira; husi liurai nia parte nia sustenta santuáriu. Tronu no relijiaun kesi an ba malu atu mantein "statu quo" no priviléjiu sira. Amasias rasik bele lakon se buat la la'o loos, nu'udar funsonáriu liurai nian ho funsaun atu defende liurai nia interese sira. Amasias nia relijiaun mak relijiaun atan nian, hakneak ba kbiit-na'in sira no taka an ba Maromak nia dezafiu sira (ne'ebé se rona no simu karik bele sobu sistema). Iha perspetiva ne'e, denúnsia Amós nian hatudu rebeliaun kontra interese podér no relijiaun nian, doutrina subversiva ne'ebé kuestiona estrutura sira no doko fundamentu orden ne'ebé stabelese ona. Tanba ne'e, tenke uza forsa sistema nian tomak atu hanook profeta nia lian ne'ebé inkomoda. Nune'e Amós hetan denúnsia, hetan konvite atu husik santuáriu no fila ba nia rain atu" buka nia moris iha ne'ebá".

Amós nia resposta hatudu momoos katak profeta mak ema livre ida, ne'ebé la atua tuir interese umanu (rasik ka ema seluk nian), maibé hodi Maromak nia mandatu. Inisiativa atu sai profeta la'ós ninian... Maromak mak mai hasoru nia, interrompe ninia moris nia normalidade no konvoka nia ba misaun ida. Liután ida-ne'e, ba nia, profesia la'ós okupasaun profisionál ida, ka forma ida atu realiza ninia interese pesoál. Amós sai profeta tanba Maromak tamak ho kbiit iha ninia vida, kaer metin nian no haruka nia ba Israel. Nune'e, profeta la preokupa ho interese liurai nian ka interese amlulik Amasias nian, ka mantein orden sosiál ida injusta no opresora.... Nia simu bolun atu sai Maromak nia lian no ninia interese mak kumpre misaun ne'ebé Maromak konfia ba nia. Hakanek karik bá, ida-ne'e de'it mak Amós buka atu halo. Nia la bele nein hakarak nonook... Ninia misaun (maski ida-ne'e kusta ba Amasias no ba liurai) iha autoridade rasik, tanba mai husi Maromak no Maromak boot liu-dook liurai. Ho autoridade ida-ne'e (ne'ebé la'ós de'it lejítima ninia asaun profétika, maibé obriga nia sai fiél ba misaun entrega ba nia), Amós haklaken kastigu ba liurai, ba Amasias no ba nasaun infiel ne'e.

SALMO RESPONSORIAL – Salmo 84 (85)

LEITURA II – Ef 1,3-14

AMBIENTE

Sidade Éfeso, kapitál Provínsia romana Ázia nian, hela iha parte osidental Ázia Menór nian. Ninia portu importante no ninia populasun boot halo nia sai sidade buras. Paulo ba Éfeso iha ninia viajen misionária daruak (kf. Act 18,19-21) no, durante ninia viajen misionária datoluk, nia halo Éfeso ninia kuartél-jenerál, husi ne'ebá nia evanjeliza zona osidental Ázia Menór nian.

Ita-nia Surat ba Eféziu sira, bele dehan ezemplár ida “surat sirkulár” nian ne'ebé haruka ba kredo oioin iha Ázia Menór, iha altura ida iha-ne'ebé Paulo hela iha kadeia (iha Cesareia? Iha Roma?). Ninia maklorik mak Tíkiku.

Ema balun haree iha surat ne'e sínteze ida teolojia paulina nian, iha tempu ida iha ne'ebé apóstolu nia misaun remata iha lorosae. Tema importante liu surat ba Eféziu sira nian maka buat ne'ebé autór hanaran “mistériu”: ne'e mak Maromak nia projetu salvasaun nian, ne'ebé horiuluk kedas define no elabora, subar ba sékulu barak, revela no konkretiza tomak ho Jezús, komunika ba apóstolu sira no, iha tempu ikus, sai presente ba mundu liuhusi Kreda.

Testu ne'ebé ohin apresenta mai ita mosu iha inísiu surat nian. Nia mak knananuk/inu litúrjiku ida ne'ebé karik sirkula iha comunidade sarani sira molok Paulo hatama iha surat ida-ne'e. Knananuk ne'e agradece ba Aman nia hahalok (kf. Ef 1,3-6), Oan nian (kf. Ef 1,7-12) Espíritu Santu nian (kf. Ef 1,13-14), katak oferese salvasaun ba ema sira.

MENSAJEN

Agradesimentu dirije ba Maromak, basá Nia mak bee-matan grasa tomak nian ne'ebé fó ba ema sira. Grasa sira-ne'e to'o mai ema liuhsui Oan-Mane, Jezús-Kristu.

Sá loos mak Aman nia hahalok/asaun tuir knananuk ida-ne'e?

Aman, iha ninia domin, hili ita horiuluk kedas (molok hakiak mundu). Hili ita ba sá loos? Nia resposta mak: “atu sai santu no sala-laek”. Liafuan santu hatudu situasaun ema ida ne'ebé haketak husi mundu no konsagra ba Maromak, ba servisu Maromak nian; liafuan “sala-laek” uza atu ko'alia kona-ba karan oferese nu'udar sakrifisiu ba Maromak, ne'ebé tenke imakuladu/moos no laho defeitu.... Nune'e, signifika, santidade (konsagrasaun ba Maromak) loos no radikál.

Aleinde hili ita, Aman predestina ita “atu sai nia oan-fudin”. Liuhusi Kristu, Aman oferese mai ita ninia moris no integra ita iha ninia família ho qualidade oan nian. Finalidade hahalok ne'e nian mak hahí ba nia glória.

“Eleisaun” no “adopsaun nu'udar oan” mak rezultadu husi Maromak nia domin boot ba ema sira – domin gratuitu ida, inkondisionál no radikál.

No Jezús Kristu, papél sá maka nia iha ho prosesu ida-ne'e?

Iha vers. 7-10, autór refere ba Kristu nia raan ne'ebé suli no ninia signifikadu maksoin. Jezús nia mate iha krús mak sinál evidente domin boot Maromak nian ba ema sira; no ho forma ida-ne'e, Maromak hanorin ita atu moris iha domin. Domin totál no radikál. Liuhusi Kristu, Maromak hasuli mai ita ninia grasa, hodi halo ita ema foun no ho kbiit atu moris iha domin. Nune'e, Maromak manifesta mai ita ninia projetu salvasaun nian (ne'ebé knananuk hanaran “mistériu”) no konsiste iha lori ita ba identifikasaun tomak ho Jezús (iha ninia kapasidade limite-laek nian iha domin no fó moris), ba unidade no armonia totál ho Jezús. Hodi identifika ita ho Kristu no hodi hanorin ita moris domin totál no radikál, Maromak rekonsilia ita ho nia An, ho ema seluk hotu no ho natureza. Husi Kristu nia asaun redentora, Ema Foun, ho kbiit ba relasionamentu

foun (la marka ona ho egoíзму, orgullu, autosufisiénsia, maibé marka ho domin no don vida nian) ho Maromak, ho mane no feto seluk no ho kriaun tomak.

Ho forma ida-ne'e, iha Kristu ita sai Maromak nia oan erdeiru salvasaun nian, konforme projetu Maromak prepara husi uluk kedas ba ita-nia di'ak (vers. 11-12).


Fiar-na'in sira ne'ebé adere ba Jezús marka ho "selu" Espíritu nian. "Selu" ne'e maka marka ida ne'ebé atesta ita-nia integrasaun iha família divina no garantia katak loron ida ita sei partisipa iha moris rohan-laek (vers. 13-14).

ALELUIA – cf. Ef 1,17-18

EVANGELHO – Mc 6,7-13

AMBIENTE

Parte dahuluk tomak Evanjellu nu'udar Marcos haktuir (kf. Mc 1,14-8,30) monta hale'u ideia katak Jezús maka Mesias ne'ebé haklaken Maromak nia Reinu. Nu'udar pontudepartida maka sumáriu-anúnsiu inisiál (kf. Mc 1,14-15) iha-ne'ebé proklama Reinu ne'ebé to'o ona; tuirmai, Jezús apresenta proposta Reinu nian ba grupu ida eksolante sira-nian, ne'ebé rona apelu no aseita atu embarka iha aventura Reinu Maromak nian (kf. Mc 1,16-20); hafoin, Marcos deskreve oinsá Jezús, ho liafuan no jestu konkretu, propoin realidade foun – katak Reinu – no interkala Jezús nia proposta ho resposta positiva ka negativa farizeu sira-nian, povu nian no eskolante rasik sira-nian (kf. Mc 1,21-8,30). Enkuantu "dalan Reinu nian" bá oin, eskolante sira hetok kesi an liután ba Jezús, sira mós tama ka implika liután iha projetu Reinu nian. Simu Jezús nia bolun, sira hatán ho modu pozitivu no tuir Nia; hafoin durante sira-nia la'o dalan hamutuk ho Jezús, sira rona Jezús nia ensinamentu sira no sai sasin ba Ninia jestu no sinál sira. Simu formasaun husi Jezús iha "eskola Reinu nian", eskolante sira agora bele ona simu mandatu atu bá mundu, atu haklaken ba ema hotu mundu foun ne'ebé to'o ona no Jezús hanaran "Maromak nia Reinu".



MENSAJEN

Ita-nia testu maka katekeze auténtika kona-ba Jezús nia eskolante sira nia misaun iha mundu nia leet. Instrusaun ne'ebé tau iha Jezús nia ibun konserva ninia sentidu no valór ba eskolante sira tempu no fatin hotu nian.

Marcos hahú hodi halo klaru katak inisiativa bolun nian mak Jezús nian. Nia "bolu sira" (vers. 7). Laiha esplikasaun ida kona-ba kritériu sira ne'ebé lori ba hilin ida-ne'e: ko'alia kona-ba vokasaun no eleisaun maka ko'alia kona-ba mistériu insondável, ne'ebé depende ba Maromak no ema dala barak la konsege komprende no eslika.

Hafoin, Marcos hateten número eskolante sira ne'ebé Nia haruka ("12"). Tanba sá 12 loloos? Ne'e maka número simbóliku ida, ne'ebé fó hanoin kona-ba tribu 12 ne'ebé forma Maromak nia Povu antigu. "Sira na'in "12" ne'e reprezenta simbolikamente totalidade Povu Maromak nian, Maromak nia Povu foun. Povu tomak (totalidade) mak hetan mandatu atu bá misaun. Sira na'in "12" Jezús haruka ba "na'in rua-rua" Karik haruka "na'in rua-rua" ne'e liga ho kostume judaiku atu viajen ho maluk, atu bele hetan tulun no apoiu iha kazu nesiedade nian;

bele mós hanoin katak ezijénsia atu bá misaun “na’in rua-rua” liga ho lei judaika, iha-ne’ebé presiza testemuña rua atu fó kredibilidade ba anúnsiu naran de’it (kf. Dt 19,15; Mt 18,16). Iha kazu naran de’it, ezijénsia atu bá misaun “na’in rua-rua” sujere mós katak evanjelizaun nafatin soi dimensaun komunitária. Eskolante sira la bele servisu mesak, iha comunidade nia ninin; la bele haklaken ideia rasik, maibé Kreda nia fiar. Sé mak haklaken Evanjellu, haklaken hodi comunidade nia naran; ninia anúnsiu tenek iha sintonia ho comunidade nia fiar. Hafoin, Marcos define misaun ne’ebé Jezús konfia ba sira (“fó kbiit hasoru espíritu aat sira”). Espíritu foer sira reprezenta buat hotu ne’ebé halo ema sai atan no hanetik nia atu to’o ba moris nakonu. Misaun eskolante sira-nian mak, hafunu hasoru buat hotu – bele ho karáktar físiku, bele espírituál – ne’ebé harahun ema nia vida no ksolok (ita bele dehan katak eskolante sira-nia misaun mak luta hasoru “salan”). Husi eskolante sira nia hahalok libertadór (ne’ebé mai husi Jezús nia mandatu) maka moris mai mundu foun, ema livre sira-nian – mundu “Reinu” nian.

Tuirmai, instrusaun sira ba misaun (vers. 8-9). Iha Jezús nia perspetiva, eskolante sira tenke bá misaun, ho despojamentu totál (hamamuk) husi soin hotu no seguransa umana... Bele lori ai-tonka ida (iha versaun Mateus no Lucas nian la bele lori ai-tonka – kf. Mt 10,10; Lc 9,3); maibé la bele lori paun, nein bolsu, nein osan, nein hatais rua. Eskolante sira tenke totalmente livre no la bele kesi an ba soin materiál sira; nia kontráriu, preokupasaun ba soin materiál sira bele na’ok sira-nia liberdade no disponibilidade ba misaun. Husi parte seluk, atitute kakiak no hamamuk an nian sei tulun eskolante sira mós atu komprende katak misaun nia efikásia la depende ba soin materiál barak, maibé iha Maromak nia asaun. Ikusmai, sobriedade no dezapegu eh kore-an mak sinál ne’ebé hatudu katak eskolante konfia iha Maromak no kontribui atu fó kredibilidade ba testemuña.

Instrusaun seluk refere kona-na eskolante sira-nia komportamentu hasoru ospitalidade ne’ebé oferese ba sira (vers. 10-11). Bainhira ema sira simu sira iha uma ida, sira tenke hela iha ne’ebá tempu ruma (seguramente atu forma comunidade ida) no la bele haksoit husi fatin ida ba fatin seluk, tuir gustu amizade nian, interese rasik ka ema seluk nian ka konveniénsia pesoál sira. Bainhira ema la simu sira iha fatin ruma, sira “tenke hikis rai-rahun husi ain” molok husik fatin ne’e: ne’e maka jestu ida ne’ebé judeu sira pratika bainhira fila husi territóriu pagaun/jentiu no simboliza renúnsia ba impureza. Iha-ne’e seignifika hakribi ema nia taka an ba proposta libertadora Maromak nian.

Ikusliu, Marcos descreve eskolante sira nia misaun nia realizasaun (vers. 12-13): sira haklaken konversaun (“metanoia” – katak mudansa radikál mentalidade nian, valór sira-nian, atitute sira-nian, filafali ba Jezus Kristu no hakohak projetu ida), duni sai diabu, fó isin-di’ak ba ema-moras sira. Ne’e katak kontinua Jezús nia misaun: liberta ema husi buat hotu ne’ebé hanehan no na’ok niia vida, atu bele hamosu mundu ida ema livre no ema ne’ebé hetan maksoin nian (“Maromak nia Reinu”).

Anúnsiu ne’ebé konfia ba eskolante sira mak anúnsiu ne’ebé Jezús halo (“Reinu”); jestu ne’ebé eskolante sira hetan konvite atu halo atu haklaken “Reinu” hanesan ho hirak Jezús halo. Hodi apresenta eskolante nia misaun iha paralelu no iha kontinuasaun ho Jezús nia misaun, Jezús konvida Igreja (eskolante sira) atu kontinua iha istória obra libertadora ne’ebé Nia hahú ba ema nia di’ak.